

E K S A M E N - nynorsk

Emnekode: JUR 103
Emnenamn: Kontraktsrett I

Dato: 13. april 2012
Lengde: 4 timer

Tal på sider inkl. framside 2

Tillette hjelpemiddel: Norges lover og ukommenterte særtrykk av lover og forskrifter

Treningssenteret Trim AS i Lillevik skulle tilsette ny dagleg leiar. Peder Ås søkte på stillinga. Det gjekk fram av søknaden at Peder har bachelorgrad i økonomi frå den statlege høgskolen i Lillevik og at han hadde arbeida deltid som personleg trenar i tre år.

Peder vart kalla inn til intervju. Dagleg leiar i Trim AS, Hans Tastad, opplyste at det var eit lite treningssenter med få tilsette og at det ikkje var uvanleg at dagleg leiar måtte ta ansvar for treningstimar. Han gav uttrykk for at Peder si utdanning og arbeidserfaring passa svært godt for stillinga som dagleg leiar. Peder vart beden om å legge fram dokumentasjon på arbeidserfaringa som personleg trenar. Han opplyste at han ikkje hadde slik dokumentasjon sidan han ikkje hadde skriftleg arbeidsavtale og heller ikkje attestar. Sistnemnde skyldast at den han arbeida for hadde gått konkurs og vedkommande hadde så flytta utanlands. Peder opplyste at den som kunne gje han attest heitte Marte Kirkerud. Han lova å prøve å få kontakt med Marte og eventuelt få ein attest frå ho. Trim AS fekk aldri attesten.

Ei veke seinare fekk Peder tilbod om stillinga. Partane møttes etterpå og underteikna arbeidsavtale der det blant anna gjekk fram at Peder skulle tiltre i stillinga om ein månad.

Nokre dagar seinare var Hans på ein privat fest i Lillevik. Han kom da til å nemne at Peder Ås skulle overta som dagleg leiar i Trim AS. Knut Vold, som er tilsett ved høgskolen i Lillevik, var til stades på festen. Han reagerte umiddelbart på denne opplysninga og sa at han kjente Peder frå den tida han studerte ved høgskolen. Knut opplyste at Peder hadde blitt dømt for ulovleg sal av narkotika og dopingmidlar. Saken mot Peder hadde fått stor mediemerksmd, særleg i Lilleviksposten der Peder også vart namngjeven. Knut sa også at Peder hadde blitt tatt for juks då han studerte ved høgskolen og at det var Knut sjølv som hadde avdekka dette.

Hans fann grunn til å undersøke dei opplysningane som Peder hadde gitt i intervjuet nærare. Han fann då ut at Peder sin erfaring som personleg trenar dreidde seg om at han ein gong i veka gjennom tre år hadde trena styrketrening saman med Marte Kirkerud og rettleia ho i treninga. Marte hadde satt pris på dette og betalt Peder kr. 100 pr. trening.

Hans Tastad kalla inn Peder til nytt møte. Han konfronterte Peder med dei nye opplysningane han hadde fått og sa at styret i Trim AS hadde avgjort å gå frå tilsettingsavtalen då avtalen måtte sjåast som ugyldig. Peder viste til den skriftlege avtalen og hevda at den var bindande.

Spørsmål 1: Kan avtalen settast til side som ugyldig etter avtl § 33?

Spørsmål 2: Har Knut Vold brote teieplikta?

Peder As kontakta sin gode venn Lars Holm for å be om hjelp. Peder gav Lars eit skriv med følgjande ordlyd:

FULLMAKT

Tvisten om tilsettingsforholdet i Trim AS har vore ei stor belastning for meg og eg ser meg nøyd til å overlata til andre å ta vare på mine interesser. Lars Holm har fullmakt til å forhandle og eventuelt inngå avtale på mine vegne. Eg meiner at det er klinkende klart at avtalen er bindande, men avviser ikkje at eg kan godta andre løysingar. Håper at saken vert løyst nansett.

Lillevik 15.3.2012

Peder As

Peder opplyste Lars om at han berre kunne avbryte forhandlingane dersom Trim AS tilbødde økonomisk kompensasjon som var mindre enn tre månaders løn.

Lars gjekk inn i forhandlingar med Hans Tastad. Lars vart veldig overraska over det faktum som Hans Tastad presenterte. Peder hadde vore nokså omtrentleg då han presenterte faktum i saka. Lars vurderte det sånn at Peder hadde ei dårleg sak. Hans sa at saka kunne løysast på den måten at arbeidsavtalen vart heva mot at Peder får ein økonomisk kompensasjon på ei månadsløn. Lars gav uttrykk for at det høyrdes ut som ei fornuftig løysing og at han var glad for at Trim AS var innstilt på å løyse saken. Lars reiste seg, tok Hans i handa og sa at han ville sende han noko skriftleg med det første.

Da Peder fekk høyre om forslaget frå Trim AS vart han rasannde. Lars roa han med at det ikkje var inngått noko bindande avtale.

Da Trim AS ikkje fekk noko skriftleg frå Lars, vende Hans seg til Lars og ba om å få tilsendt den skriftlege stadfestinga på forlikssavtalen. Lars opplyste då at det ikkje var inngått noko bindande avtale. Han hadde for det første ikkje akseptert tilbodet frå Trim AS og for det andre så hadde han ikkje fullmakt frå Peder til å inngå ein slik avtale.

Spørsmål 3: Er det inngått rettsleg bindande forlikssavtale?